



**Xabier Pérez Igrexas, en calidade de Portavoz do Grupo Municipal do Bloque Nacionalista Galego (BNG) no Concello de Vigo, ao abeiro do establecido no Regulamento Orgánico do Pleno e da restante normativa aplicábel, eleva ao Pleno da Corporación para o seu debate a seguinte**

## **MOCIÓN**

### *DEZ MEDIDAS URXENTES PARA OS CEN PRIMEIROS DÍAS DE NOVO MANDANTO MUNICIPAL*

#### EXPOSICIÓN DE MOTIVOS

Nesta primeira moción do novo mandato municipal, o Bloque Nacionalista Galego formulamos 10 medidas concretas e urxentes que cómpre que o Goberno municipal desenvolva dentro dos seus primeiros cen días co obxectivo de atender as necesidades reais das viguesas e dos vigueses e para recoller o mandato cidadán das eleccións do pasado 28 de maio que, retirando case 20 mil apoios ao actual grupo de Goberno, marcou con clareza a necesidade de mudanzas.

A primeira tarefa é a de avanzar, con determinación, cara a unha democracia municipal de maior calidade facendo da participación efectiva da veciñanza e dos colectivos na toma de decisións un dereito, e garantindo que o uso dos recursos municipais, que definen os orzamentos, se decida contando coa opinión de todas e todos.

No actual contexto marcado por una innegábel situación de emerxencia social, empurrada polos efectos derivados da crise inflacionista, pola non recuperación de emprego (con 9.500 postos de traballo menos na cidade dos existentes en 2010, segundo a última EPA dispoñíbel), pola continuada perda de poder adquisitivo dos salarios e o aumento da pobreza e o empobrecemento (con 60 mil viguesas e vigueses en risco segundo o índice Arope), é fundamental un enérxico reforzamento das políticas municipais destinadas á protección social, facilitar o acceso á vivenda e promover a creación de emprego, como primeiros pasos na liña de converter o Concello de Vigo nun grande parapeto social que protexa os sectores socialmente máis vulnerábeis e o conxunto de clases populares e traballadoras.

Atendendo o mandato dos masivos 8 de marzo cómpre pasar dos discursos aos feitos, alargando tamén de maneira concreta e verificábel os esforzos municipais destinados ao combate de todas as formas de violencia machista e a mellor atención das mulleres.

Poñer fin ás políticas municipais que nos últimos anos fixeron avanzar a desertización cultural, esixe entre outras cuestións abandonar o insuficiente modelo de salas de estudo e lectura, nas que non hai nada que ler, e retomar o proxecto de dotar a cidade dunha Rede de Bibliotecas municipais en todos os barrios e parroquias que o BNG, desde a área de Cultura, quixemos poñer en marcha no 2011 coa apertura da Biblioteca Neira Vilas do Calvario.

Aliás, é claro que hai unha rotunda maioría social na cidade que aposta en avanzarmos cara un Vigo máis sutedábel en termos ambientais efectivizando as declaracións de situación de emerxencia climática, aprobada por unanimidade no inicio do anterior mandato, e tamén a de cidade contraria a toda forma de maltrato animal, acordada por impulso do BNG en decembro de 2022.

Por outra parte, é imperativo poñer fin ás políticas coas que nos últimos anos o Goberno municipal castigou a mocidade de Vigo a través do total desmantelamento das políticas xuvenís, e acabarmos co maltrato que padece o deporte de base da nosa cidade e que se exemplifica no estado lamentábel de diferentes dotacións deportivas.

Polo que, a través desta moción, o Bloque Nacionalista Galego propón ao Pleno a adopción dos seguintes

#### ACORDOS:

Instar ao Goberno municipal a adoptar, dentro dos cen primeiros días do novo mandato municipal, as seguintes medidas:


1. Promover un **novo Regulamento de Participación Cidadá** que, entre outros, permita poñer en marcha un mecanismo de Orzamentos Participativos para a elaboración dos presupostos municipais do vindeiro exercicio 2024 coa participación directa do tecido asociativo e da veciñanza.
2. Creación dunha **Axencia Local de Vivenda Protexida e Social** como primeiro paso para constituír un Parque municipal de vivenda pública.
3. **Redimensionar o Plan Municipal de Emprego e o programa Vigo Emprega** co obxectivo de multiplicar por 4 a súa dotación orzamentaria de cara as súas vindeiras convocatorias.
4. Implementar, optimizando e ampliando outros recursos e axudas xa existentes, unha **Renda Social Municipal** que poida complementar outros ingresos de

subsistencia (Ingreso Mínimo Vital, Risga, Pensións non contributivas, etc) até o salario mínimo interprofesional.

5. **Aumentar os recursos cos que conta o Centro de Información ás Mulleres** e iniciar o proceso de licitación para a creación de dous novos centros para os barrios de Coia e do Calvario.
6. Reiniciar o proxecto para dotar a cidade **dunha Rede municipal de bibliotecas en todos os barrios e parroquias**, garantindo en primeiro lugar que a proxectada en Teis estea dotada de libros e persoal bibliotecario en lugar de reduci-la a unha sala de estudo.
7. Implementar a Estratexia Zoo XXI para avanzar na efectiva **reconfiguración de Vigo Zoo** nun centro de recuperación e protección de fauna e dun espazo de sensibilización ambiental, poñendo fin ao modelo exhibicionista.
8. Dotar con, como mínimo, 1 millón de euros un **Programa Municipal de protección, valorización e uso social dos Montes da Cidade**, en colaboración coa Mancomunidade.
9. Ampliación de horarios e servizos do espazo **Vigosónico**, recuperación dos servizos que se prestaban na **Casa da Xuventude** e iniciar as actuacións precisas para volver poñer en marcha o **Súbete ó Castro** e o **Punto Xove**.
10. Proceder á inmediata licitación das obras e actuacións necesarias para a **reapertura da piscina municipal de Teis** e para a atención das graves deficiencias que presentan as **pistas de atletismo de Balaídos**.

Vigo, Galiza, 25 de xullo de 2023.

Asdo.



SR. ALCALDE-PRESIDENTE  
CONCELLO DE VIGO

